

小峴山人詩文集

小峴先生遺像



同里張式畫

昔者奉手穆如風規金心內屬  
玉色外慈發皇道德軌物文  
辭先生往矣吾將疇師

武進後學李兆洛贊

刑部侍郎秦小峴先生墓誌銘 新城陳用光撰

道光元年秋七月初十日 予告刑部右侍郎秦公遂菴卒於家是年四月二十三日公嘗致書於新城陳用光曰余衰病增劇恐旦暮入地君知我又素治古文敢以他年墓石之交相屬余生平治行子弟無能盡知者當畧具梗概屬瓊山張編脩岳崧爲行狀以授子余得書爲憮然者累日旣得訃益愴然以悲謂公何相信之深而自知之審也旣見張編脩問以行狀則自海外來過惠山未嘗見公未幾公弟永平太守沆以書及公子緇武所爲行狀來速余踐前言余雖不能文然辱公知

如其曷敢辭按狀公諱瀛字淩澹一字小峴晚又號  
遂菴宋龍圖閣直學士少游先生後也學士子湛政和  
中爲倅於常州因家焉十傳至諱維楨者始遷於無錫  
明湖廣巡撫諱燿者公八世祖也入

本朝舉康熙己未鴻博歷官至左春坊左諭德諱松齡  
者公本生高祖也曾祖諱實然祖諱春田父諱鴻鈞三  
世皆以公貴

贈榮祿大夫兵部右侍郎加一級妣徐氏

贈一品夫人公兄弟五人於次爲長也幼有異稟讀書  
能兼人學爲詩古文輒千言立就外祖徐二磯先生及

從祖文恭公皆器之年十六補縣學生年三十二以貢入京師是年遂舉京兆丙申春

純皇帝巡幸山東公獻賦

行在以能知題所自出已黜而特爲

純皇帝拔置一等

賜內閣中書未幾入直

軍機丁母憂歸旋丁父憂治喪葬一以禮旣服闋補中書以京察一等擢內閣侍讀復以京察一等

記名以道府用尋遷戶部郎中癸丑出爲溫處兵備道調杭嘉湖兵備道擢浙江按察使調湖南廣東按察使

擢浙江布政使入

覲乞內用補光祿卿轉太常卿順天府尹擢刑部右侍郎緣事左遷補光祿卿擢左副都御史充會試知貢舉擢總督倉場戶部右侍郎旋奉

命以二品頂戴爲左副都御史擢內閣學士兼禮部侍郎遷兵部右侍郎轉左調刑部右侍郎以目疾乞病歸自是家居者十有一年卒時享年七十九公旣以文名而六應禮部試俛得復失當直內廷時益訪求國家掌故爲有用之學性耿直而仁恕勇於任事意所不可雖遇權貴持論不少假借又勤於其職故特蒙

純皇帝知遇

記名以道府用而更畀以煩劇之任也公之勇於任事在溫處時除永嘉數十年以生監充莊長之弊而民旣免役賦亦無逋擢浙江提刑宣紹台大水歲饑甚有司以預報收成不敢請賑公謂水出不虞正可據實上聞以蘇民困言於撫軍乃得請及調湖南歲又饑長沙衡陽及他縣奸民聚衆奪米者事數起公旣設法擒治其渠魁而不爲株連遍曉諭之民乃定而衡陽大水漂沒田廬無祔先一年衡州歉收雖未成災而民已不足於食是時陝西奏撥兵米其派及湖南者衡州與焉公曰



災傷如是奈何不議賑而議餉力請於撫軍得截留他縣兵米而減價平糶民乃定公之急紓民患如是及其讞獄則寬猛相劑而務得其情在溫處時據乾隆初年徐兵備縣允文檄明醵金埋樁爲會之非邪教以釋瑞安民池聖功等之罪而訊得仙居縣道士李鶴舉以無爲教聚徒衆者計擒治之誅渠魁數人而寬其連染者有差提刑浙江促水師提督援定海普陀之盜警並請於大府厲水師練鄉勇大府用公策而盜以戢治韓球闖阿三之獄皆當其罪提刑廣東擒治亂民梁脩平而不自居其功治吳蝦喜之結黨於順德者撫黎民之爲

亂於瓊州者懲賭博之號爲白鴿標者而其在浙江平  
反定海難民蔡長興十二人之非盜兩上書於撫軍卒  
得釋及海盜江文五誣其族與某通實則某嘗首文五  
於縣有縣牘可證撫軍旣以入告而卒能聽公言以釋  
某尤爲世所難行者爲太常時嘗奏陳廣東事宜謂剿  
捕海盜之法在討軍實樹聲威戒虛飾而治內地奸民  
之勾連海賊者則嚴防守必先澄吏治澄吏治必先固  
民心其要在清獄訟抑冗濫懲蠹猾

睿皇帝亟稱善焉故旣調府尹而遂任以司寇之職其  
在司寇屢有平反雖定讞公察其誣必力爲白之獄無

寃者

睿皇帝因益器公故公雖以事鑄級一歲六遷而仍畀以司寇蓋知公之耿直而仁恕爲能勝祥刑之任也公於詩古文及制舉業皆力追古人風格而能有所自得少時爲齊次風杭堇浦所知旣得舉則見重於竇東皋官京師與王惕甫魯山木以文字相質論及見姚姬傳先生而彌有契合焉當官太常時用光常質以文辱公策厲之甚至歲壬申訪公於無錫公來舟中語移晷欲留之遊惠山不果自是雖以書相往復而不及見公矣有自南來者輒問公近狀知公推其孝友睦嫻之思設

義學脩家譜而復以其餘脩縣志誨誘後進勤懇如不  
及而每與余書輒若其意有不釋然於中者蓋公之所  
志者大欲以才副其學而常患於不得行其意其官中  
外及家居旣已卓有所表見矣而欲然猶以爲今之時  
之難而力學古人亦未易言也公所著有淮海公年譜  
已未詞科錄無錫金匱縣志續脩家譜小峴山人詩友  
集板藏於家公生於乾隆癸亥正月二十八日卒於道  
光辛巳七月初十日

誥授榮祿大夫兵部右侍郎加一級配朱夫人前卒

贈一品夫人子四人長緇武監生江西候補知縣歷署

彭澤峽江樂安宜春縣次細文監生以後其仲叔濂皆  
朱夫人出次細承殤次細業幼皆側室戴出孫七昌熙  
細文出幼撫於細武昌煦昌烈昌燾細武出昌燾幼撫  
於細武之從弟國枏昌熾昌煜昌焯細文出昌煜府學  
生其入泮時與公補縣學生同歲公所爲賦同遊泮宮  
詩者也曾孫二若璜若珩道光三年十月十二日葬公  
於富安鄉礮石尖之阡銘曰

錫山之麓淮海裔曰生俊傑昌厥世尙書諭德名相次  
抱仁趨義富文字迴翔

禁省歷卿寺中越粵楚勤吏事其學旣殫才則試摧剛

煦柔播威惠決剔疑似無鄣翳意所孤行屹不避終達厥誠溥厥利

帝重秋官方

簡畀歎惜其歸

溫語被一星將終伏衡泌遙勸

鼎湖唯掩涕公壤坦坦恒樂易我昔與遊數譚藝諾公見屬爲公誌千秋萬世名不替

刑部侍郎秦小峴先生神道碑 安化陶 澍撰

嘉慶十五年刑部侍郎秦公以目疾乞骸骨歸士大夫送者載道咸望其再出而公遂家居講學以終道光元年某月也享年蓋七十有幾云惟無錫秦氏世稱有人聖祖開鴻詞科時與睢州湯文正公同舉以進士改編修官左諭德學者稱蒼峴先生是爲公高祖官翰林院侍講以理學事

世宗學者稱南沙先生是爲公從曾祖

高宗朝仕至刑部尚書太子太保謚文恭治五禮明五刑爲世名臣是爲公從祖公丕嗣前德得古文法於蒼

峴得經術於南沙得朝章國憲於文恭漉液融根涵泓  
龐碩疑疑樹立績學以成乾隆三十九年中順天鄉試  
四十一年

純廟東巡獻賦

行在

賜中書公於內閣以中書遷侍讀爲軍機章京於外歷  
溫處道杭嘉湖道浙江湖南按察使於九卿爲光祿寺  
卿太常寺卿都察院左副都御史於府尹爲順天府於  
六部爲戶部郎中累官兵部刑部工部倉場左右侍郎  
又嘗知會試貢舉故事非進士出身不命公以舉人異



數也凡仕中外三十四年以按察使刑部最久事無滯  
刃以直與法用意全到於浙於廣屢平反海盜之以良  
被誣者於湖南於浙屢爭收成之不復報災與軍興之  
不敢請賑者折疑似之獄於一色一言爭讞成之案或  
至再至三每有所救正然亦以是多齟齬不合擢浙藩  
入

見遂乞內用

天子知其才且伉直由京卿遷府尹旋昇以司寇執法  
如初遇不可以次紙爲疏雖多格於時議而去位後刑  
部歲更條例於公言猶時見諸施行顧公意恒自嘆方

仁廟竦意嚮用遽以年致仕未幾又以疾請解職

天子雖勉

俞其請仍

諭俟痊愈起用而公竟不復出矣里居十餘載布衣蔬食  
蕭然如寒士比卒人猶以爲未竟其用云公諱儼字淩  
滄號小峴晚自號遂菴言遂其初志也生平好汲引士  
類與之談藝孜孜不少倦治古文法尤嚴臨殿語其孫  
及甥曹堉以墓誌屬新城陳司業用光以墓表屬余余  
重公遺意又嘗辱公寵銘其先人敢辭不文用大揭公  
於錫山之阡以表公之清德俾世泰氏之望

# 序

吾師少司寇秦遂菴先生以詩文名垂四十年海內誦其詩文每錄而刻之先生顧歔然不自足今年七十有五始自編次目錄定爲詩二十六卷古文辭六卷續集二卷先生詩始宗盛唐繼汎濫於蘇陸諸家渾渾浩浩無所不有而要歸於性情敦厚風格高迴其文出入韓歐大約於震川爲近而義法簡嚴則得之望溪方氏先生研窮經史學術旣正而又仕宦數十年多歷事變舉凡立身行已之方謀國治民之術俱見之於其文湘陰周牛帆錫溥桐城胡稚君虔嘗曰先生詩文一代大家

序

之詩文也兩君並深於學世之讀先生詩文者當必以  
兩君爲知言而欲求先生所以爲詩文之本夫固不僅  
在詩文矣嘉慶二十二年秋九月受業烏程凌鳴階謹  
識於東林精舍

序

杭嘉湖兵備使者無錫秦公自謨所作詩古文詞都爲一集以示及門袁鈞鈞歛衽卒業作而嘆曰此中聲也有德者之言也公以薇省從臣久直樞要遷侍讀改戶部郎中出爲溫處兵備改今官中間三權按察使敎歷中外者且二十年中立不倚未嘗爲時風衆勢所動搖其剛潔之操慈仁之心表裏洞徹終始不渝盎然若春之溫凜乎如秋之肅初非意爲名高而一言一動往往與古人會蓋公德性敦厚又能肆力於聖人賢人之書以充其問學故深造自得至於如此凡公之所以爲文

若詩皆卽公之所以爲人言行相顧較然不欺聆其言卽可以知其人故足重也夫六經皆載道之文自來作者未有不本原於此而能卓然以成其家者然學有純駁文亦因之而異故曰文章如面不可誣也尙書曰詩言志志者心之所之故言爲心聲韓子曰根之茂者其實遂膏之沃者其光華仁義之人其言藹如是故言行者君子之樞機也今讀公集類多因文見道深有得於古之立言者之指舉凡謀國治民之大篤近舉遠之誠宅心之術行己之方娓娓乎言之不倦而忠臣孝子畸人端士貞婦烈女之行事又往往樂道以成其美他若

登臨感舊卽事徵詞亦必澤乎詩書本乎忠信颯颯乎  
大雅之遺斯其可以行遠傳後無疑也竊自念少孤露  
不敦於學繼從鄭贊善誠齋先生游始識趣舍之路而  
貧不自存傭書養母舊學多所荒落公乃於稠人中加  
之賞識游揚於當代公卿大人之間者不啻口出蓋仁  
人君子之用心所以獎掖後進者如是今幸以樗散瓠  
落之材得爲大匠所錄附名不朽輒敢綜公述作之大  
凡以告天下之讀公集者知公言皆內心之發毋徒以  
文章之美淺之乎測公也嘉慶二年日南至門下士鄞

袁鈞拜手謹識

序

原序

自

憲皇帝以軍機處領密勿常置重臣其下以內閣中書舍人入中給事由舍人入者後雖累遷或至二三品不出於今六七十年頗參擇他曹矣要惟舍人爲本初於京朝官最名華要非通敏乘時才略之士無繇以入其人而自軍機來者處士大夫閒往往衣冠笑語望而可識而予與秦君小峴相交驩八年彌久而未始覺其身之在禁近也君爲人翛然自遠落落然不與時俗爲取舍以



召試受知於

上爲舍人侍讀郎中凡在軍機十有餘年生平以制舉  
文自負然一得於鄉試而已他試輒絀竟以詞賦入官  
其於詩作之特多諸體靡不工當其得意時蕭寥乎有  
遺世之音於古文辭雖性能而好之顧不輕作又時時  
謙讓以爲難未嘗以自名閒出一二篇示予雄駿絕出  
實有得於古作者所以立言之指而非徒其辭云爾也  
予旣服君所爲力贊君君亦以予言始極意爲之爲之  
日進而與予相講勸日益不衰以予之遊於世與學士  
大夫以文字相劇切不爲不多又未嘗數數遇有如君

者也烏虜君於科名官職之利鈍遷滯便不便皆適然  
不置愠喜於胷中而獨於學問文章則雖固陋如予者  
一言而能使之不忘於心如是豈君子之薄身厚志而  
不肯與世同盡者其立意大較然歟彼其自待也遠則  
求慊於己也難雖於文辭之末猶不能苟焉以自欺而  
況乎服官制行之大者哉君曩序予詩若文因亦自哀  
所著爲賜泉堂集屬予一言予卒卒未之能應比者  
詔以君爲浙江監司浙江善處也監司尊官也遊於君  
者莫不樂君之遇而羨其行雖然君旣不有於軍機何  
有於監司自是釋扈從倖直之勤而有官方民俗之寄

及物濟人之美君所自期與人所期於君者又不在乎  
區區詩若文而詩若文之所載而出者抑有不可以涯  
量者已及是將別爲之序以要之乾隆五十八年秋九  
月長洲王芭孫

古人一書不兩序余詩古文既有袁生序矣而復刻  
王學博惕甫原序者以其序在數年之前立言之旨  
不同也後又附歸安吳胥石宜興吳仲倫兩序又以  
一序詩一序文各有所當也故刻而并識之嘉慶五  
年春三月秦瀛自識

序

先生始官中書時偕余客同年楊鑑亭所鑑亭時方席  
貴盛宅利近處然頗嫌空曠後戶臨廣院冬月接席其  
飯北風掀帷幙直入沙土全集寒氣凜凜襲人余瑟縮  
手顫幾不能挾杯飭先生顧談說縱橫旁及詩古文辭  
波涌雲疊時亦捉衿擁鼻而談益纏纏不止其後先生  
出爲監司則余爲部民間脩敬入謁先生掃榻延客問  
無恙外曰吾來此已數年而子不來今始來耶蓋計與  
爲別已二十年因爲言世情遷改鑑亭從塞外歸憔悴  
牢落非復昔時面目相爲嗟嘆者久之已而曰子久不

見吾詩今已成十二卷矣出使卒讀問曰子視吾詩在本朝可誰比者余謂先生之詩變化馳驟而神味具足如雷雨之動滿盈而百穀草木皆甲坼也此當於唐人中求之下此弗論也先生曰惡有是雖然子爲我序之余曰何敢哉當世多能言之士先生舍貴而取賤可也舍工而命拙奚取焉序何敢雖然得附名卷末幸也是用瑣述曩昔游處之雅且以見先生之敦舊故有惓惓無已者於是乎書嘉慶五年二月日歸安吳蘭庭  
六經聖人之文其言至精至大萬物畢具聖人旣沒迄乎戰國之時諸子百家紛紜淆亂惟孟子荀卿采六經

之文以著書發明仁義禮樂之旨粹如也廓如也自是厥後作者代興而司馬子長韓退之傑然相望於千百年中如山之有泰華焉卽其辭考之違於道者亦鮮矣蓋古之能爲文者理莫暢於孟子荀卿法莫備於子長退之此四君子者其文皆本於六經由其道可以上達於孔氏後之學爲文而求合於聖人之道者舍四君子其奚適哉雖然四君子之文具在學之而能至焉者寡也疾趨焉患其蹶也故必擇其能合者而假塗焉以循之則如宋之歐陽永叔蘇明允子瞻曾子固王介甫明之歸熙甫

國朝之方靈臯皆其選也岐而之他有合焉者否也無錫秦小峴先生以所爲文示德旋德旋受而讀之考其師友淵源所漸漬固已及乎熙甫靈臯而馴至乎永叔子固蓋不相襲也而神與爲合惟其本同也於以上追孟荀之徒而從之則其塗旣正而可以無戾乎六經之旨矣若德旋者以無本之學治古文妄意希合退之乃徒得其形似讀先生文益使子悚惕慙慙而不自知所以裁之也嘉慶四年孟秋之月宜興後學吳德旋

小峴山人詩集目錄

卷一

古今體詩一百六首

卷二

古今體詩九十九首

卷三

古今體詩一百三十首

卷四

古今體詩九十二首

卷五



古今體詩一百九首

卷六

古今體詩八十五首

卷七

古今體詩九十五首

卷八

古今體詩五十四首

卷九

古今體詩一百五十四首

卷十

古今體詩一百三十首

卷十一

古今體詩一百四十五首

卷十二

古今體詩一百十九首

卷十三

古今體詩七十四首

卷十四

古今體詩六十一首

卷十五

古今體詩一百二首

卷十六

古今體詩九十一首

卷十七

古今體詩一百五十首

卷十八

古今體詩一百六十六首

卷十九

古今體詩一百十八首

卷二十

古今體詩四十五首

卷二十一

古今體詩五十三首

卷二十二

古今體詩九十九首

卷二十三

古今體詩五十六首

卷二十四

古今體詩一百十八首

卷二十五

古今體詩七十九首

卷二十六

古今體詩八十六首

小峴山人詩集卷一

無錫秦 瀛浚滄

雜詩八首

六經破淳悶人生憂患始吾樂觀大易一探義文旨吉  
凶與悔吝樞機卽在邇平塗起嶮巇大木生蟲蠹知進  
不知退厥咎良有以幽人筮貞吉堅冰脊所履

宣尼稱猥者於世有不屑漢代多畸行孤標一何潔俗  
儒喜鄉愿誰能秉直節三黜柳下愚餓死首陽拙刳方  
以爲圓繞指可鎔鐵東隣有一士乃獨安蹇劣希風夷  
與惠亮爾緬前哲

天道曲如弓恢恢亦多漏富貴與福澤果是誰所授孔  
子仁而貧陽虎暴而富顏回何以天盜跖何以壽殃慶  
非人致其理莫能究君子觀其恒經經與道守脩身以  
俟命怨尤復何有

曉出東郭門行李何烜爛高車盛儼從觀者羨且歎爲  
言宦成歸光輝動里閭歸遇窮巷士短褐不掩胷局促  
衡門下日高炊煙斷高譚王伯略浩歌徹霄漢笑視齷  
齷者斗筭焉足算

老子言守雌韜晦完其天昏昏與默默是曰大道門寧  
居萬物後莫爲萬物先賈生善痛哭三十嗟無年禰衡

賦鸚鵡厥身亦殞焉懷才苟自炫有如明膏煎何若隱  
蓬戶匿處葆貞堅匏以無用繫樗以不材全

農人苦畊稼勞勞耘與耔歲晚田功成所欣冬日美官  
稅亦已畢足不入城市負暄茅簷下野語無臧否五帝  
逮三王不知何代氏庭前數株樹鳥雀鳴不止家釀有  
斗酒舉觴對婦子

川塗脩且廣波流水瀾瀾言與故人別送子長河湄日  
月如車輪吾生良足悲挽衣不可畱戀此須臾時孤帆  
自茲去竚立不能歸

西林有古梅皓然冰雪姿幽香散荒谷如與春風私惜



哉溷荆棘開落無人知知希詎足貴不知亦奚悲孤芳  
自珍惜甘爲桃李嗤

循黃公澗至忍草菴二首

緣崖涉秋澗盤石屢迴轉偶因孤興發空山愜幽踐虛  
景重湖深連陰衆峯變巖邊乳泉細松際餘風善山鳥  
時一鳴不知山深淺寂寞叩寒扉遙驚隔林犬

茅茨結雲構一龕鄰石壁欲問楞嚴字焚香禮禪客階  
前羅衆芳零落無人摘清機滿空虛幽篁弄寒碧夙懷  
清淨退淹留便終夕空山少來者惟見麝麝跡

贈梵上人

寒城明積雪寂寞古僧居禪棲數十載保身守清虛坐  
對優曇花閒翻貝葉書閉關不知臘靜極意有餘但看  
梅花發春風來前除香臺自朝夕獨悟無生初

遊管社山莊

石出寒流清幽篁映虛館微風叢際來空翠忽凌亂乳  
竇泉脈動峭壁煙華散坐深潭影移境轉山色換息機  
渺漢陰歸舟復三歎

遊石門白鶴道院

絕壁迴松風風敲石門響緣蹊薜蘿暗梯閣簷楹敞始  
歷軫稍紆屢轉趾無枉煙深寒翠積葉落空林廣木杪

人獨歸泉邊月初上靈仙未可接抱琴自來往

僧廬獨坐

早歲喜學道心清常晏如茶煙通竹塢佛火出松廬人  
靜罷齋後山空鳴梵初因之悟禪寂潭月淨涵虛

訪徐石漁於沙村精舍

興至輒相訪百年耆舊存鬚眉看角里橡栗老羌村微  
雪鴉爭樹斜陽客到門盤餐期信宿晤對戀清尊

月夜訪友

不寐踏山月茅堂聞苦吟言循松徑入獨擁夜燈深葉  
落正秋夕鶴鳴多道心相看忘言說聽爾礪邊琴

止水高公祠

生死一滄浪騎龍去帝鄉李膺方詔獄屈子竟沈湘敗  
渚寒蟲弔空亭大鳥翔秋風薦蘋芷環碧繞書堂

睢陽廟

一慟元都廟登陴百戰難孤城無鼠雀諸將共心肝死  
欲吞阿睢生當滅賀蘭猶憐聞笛夜辛苦陣雲寒

秋草

綠茵芳徑憶行旃一夜秋風掃翠層暮雨螢飛蕭帝苑  
夕陽人弔漢皇陵平蕪莽蒼思盤馬古磧荒寒記掠鷹  
野火原頭燒不死春來依舊長鬚髯

秋柳

記向春風映酒壚  
短長亭送夕陽  
孤樓頭入破誰家笛  
城上啼殘昨夜烏  
遠塞三秋停叱撥  
寒塘九月戰菰蒲  
就中大有蘭成感  
搖落江潭樹已枯

京口與程湘左別

月落廣陵樹  
西風潮欲生  
滄江一夜雨  
送客寄奴城  
余亦辭鄉國  
揚舲指舊京  
明朝何處宿  
無數碧山橫

送友之金陵

南朝一片月  
只在板橋西  
樓笛隔江起  
宮鴉何處栖  
故人自茲去  
今夜宿青溪  
孤枕應無寐  
秣陵秋已淒

史閣部祠

丞相當年此誓師  
廣陵風雨颯靈旗  
中原拜表文山在  
上將登陴鄂國誰  
城社一堂喧燕雀  
弓刀四鎮角熊羆  
忠魂地下逢知己  
謂左忠毅嗚咽寒潮皖水湄

山行

嶺上仙禽擣藥聲  
泉邊徑轉石梁橫  
白雲忽起青松頂  
人在青松頂上行

多景樓

獨鳥去悠悠  
滄波如此流  
山川盡吳楚  
戎馬失孫劉  
帆與江雲遠  
天連海樹秋  
數聲京口遠  
吹恨上高樓

韓蘄王廟

百戰波濤舊壘空  
勳名汗馬泣英雄  
沈冤獄已成三字  
投老人誰問兩宮  
南渡江山驢背雨  
中原鼙鼓鬢絲風  
千秋巾幘還畱跡  
附祀荒岡廟食同

舟中望焦山

初日海中上寒螺  
開杳冥潮來吳甸  
白山積漢時青三  
詔畱焦洞千秋剔  
鶴銘華陽問遺跡  
吾欲破滄溟

阻風燕子磯醉後作歌

烏衣渡江落矯翰  
故壘日日愁風湍  
吳楚青蒼渺一髮  
六朝人去江山寒  
秋高八月初繫纜  
長江如練鋪冰紈

馮夷儵忽蹋波舞檣烏颯沓鳴桅竿纔聞鏗訇戛水石  
旋覺澎湃摧煙瘴盤渦鯨跋蹴巨浪幽窟鼉吼掀狂瀾  
墨雲遮天海鶴叫雪瀨捲地江豚灌金陵濁醪恣拍飲  
狂醉敲碎青琅玕降帆鐵鎖一轉眴青旗紫蓋雙飛丸  
長城自壞漫北顧新亭對泣徒南冠酒酣月上夜向乙  
蛟龍隱隱泥沙蟠神女乘潮出遊戲起視北斗星闌干

木末亭

慟哭金川事麻衣碧血存石城飛燕子滄海失龍孫吳  
淝終須反成王豈少恩荒亭畱木末還傍孝陵園

鷲峯寺



煙雨南朝舊業荒  
冶城人事幾滄桑  
黑頭江令無人問  
畱與秋鶯話夕陽

青溪雜咏

青溪渡口木蘭橈  
寂寞空城打暮潮  
一種閒愁消未得  
月明樓上美人簫

簫牀禪閣雨如絲  
消得南朝一局棋  
睹盡興亡都不管  
閒雲飛過蔣山祠

板橋蕭瑟冶城荒  
馬糞烏衣舊姓王  
贏得青溪水鳴咽  
西風愁殺莫愁孃

夜烏啼斷白門秋  
夢醒秦淮舊酒樓  
碎雨零煙多少恨

垂楊無語只低頭

金陵懷古六首

洛下衣冠散曉星  
神州有淚灑新亭  
石頭重鎮桓公墓  
麀尾清譚老氏經  
龍化滄江還寂寞  
燕飛古巷極飄零  
祇應愁殺哀箏曲  
月落尊殘不忍聽

王氣彭城踞上游  
寄奴虎視起新洲  
檣蒲草澤英雄在  
瓜豆中原割據秋  
太息北人思飲馬  
可憐南國唱符鳩  
白門又報收袁粲  
付與遺民怨石頭

雞鳴埭下暮雲愁  
依舊昆明太液秋  
讀賦西京嗤趙鬼  
哭臨東苑笑羊鷺  
春風楊柳連鴛瓦  
夜月蓮花映雉頭

至竟石城須決別深宮枉祀蔣山侯

蕭公北顧駐新營殿上吹脣孽已生竺國黃金開建業  
壽陽白馬近臺城七官無術能匡難五月何人爲解兵  
不獨江南悲庾信茂陵腸斷沈初明

水咽銅虬漏滴壺擘箋賭酒極懽娛井邊未見宮人泣  
苑外先聞野鳥呼擒虎軍聲來白下蟠龍山色失黃奴  
隔江商女殷勤唱猶記庭花一曲無

灰燼千年記五官凌波軍已散江干春風多怨紅藍死  
夜雨難教碧水乾舞到霓裳容易破夢回雞塞不勝寒  
興亡只向宮娥說一闕家山淚暗彈

燕子磯

突兀秋雲裏危磯鎖寂寥天風吹積鐵日夜走寒潮故  
壘精靈泣空江劫火銷垂綸灘畔叟頭白話南朝

永濟寺

洞壑納羣籟林深無雜喧寒泉生石髮秋雨洗雲根人  
宿煙中寺僧歸江上村懸崖誰撒手一向翠螺捫

中夜起坐望月

夢覺山窗明下階整衣帶石泉散清影涼月森松檜衆  
響一已寂澄心與之會獨撫邱中琴何人賞絃外

月夜至惠山寺

小峨山詩集 卷一  
松子落秋夜松齋僧未眠林穿山月小水映佛燈圓夕  
梵生虛壑寒禽宿暝煙蒼然九峯色無語石牀前

秋夜報恩道院與侯青谿道士別

街鼓逼嚴城竹院鐘魚靜了了潭上月照見石髮冷夜  
寒人未栖露下鶴先警溪橋一分手落葉迷歸影

白鶴道院同青谿夜坐

道士誦經罷山房寒翠重鶴聲涼似水人影瘦於松飢  
煮青精熟茶煎綠雪濃名言兩俱寂殘月挂中峰

松隱閣

山深多白雲寒松隱高閣人語白雲中驚起松間鶴

雪後偕劉雪坡登錫山望湖亭飲朱道士山房

九龍之峯何皚皚具區萬頃白一杯我鞭素虬駕暘鶴  
迴立縹緲俛八垓望湖亭在錫山頂林表霽色明蒼苔  
畸人劉師服從我臨高臺七十二峯小於島點點散作  
千瓊瑰明湖在島山在趾拍手大笑胡爲來荆關粉本  
見一色放眼荒忽疑蓬萊蕊珠宮闕羽衣舞白日照耀  
無纖埃山房朱道士爲我撥玉醅我昔好遊事登眺五  
嶽未到自媿非僊才道士爲言太華峯頭玉女峯最勝  
裹糧便擬凌崔嵬仙之人兮紛紛而來下手橫玉篴吹  
落梅茅龍背上一長嘯丹丘長往不願回無爲跼促守

鄉土徒令熊咆虎嘯猿啼哀回頭雉堞復歸去湖山夢醒墻根槐

惠山寺題壁

幽篁隔水映長松日落深山響暮鐘偶歇籃輿不歸去愛他殘雪兩三峯

題秋渚垂竿圖

江水兮湛湛江樹兮瑟瑟南山兮楓青北渚兮蘆白秋風嫋兮洞庭波曠無人兮凌盤渦天斜兮黃簑獨速兮綠簑懸釣竿兮不下若有意兮浮家叶木蘭兮沙棠載酒兮擊楫臨清流兮觴百壺浩歌發兮弄明月

水閣

欲雨不成雨涼陰生四圍溪雲浮閣動沙鳥入門飛身  
世此無事乾坤聊息機漁歌傳別浦柳外一船歸

山園晚興

青山秋欲暝園林穿窬篠流連池上酌寂寞煙中釣竹  
風流夕梵松月墮微照吾意寢坐忘識此無言妙

將自山中歸不果仍投宿惠山寺

蒼蒼別翠微欲返屢回顧白雲出相送攔斷溪橋路日  
暮歎僧扉復向山中住夜禪松桂香林端月初吐

石浪菴



透迤盤石磴仄徑起橫峯日午尋幽藥雲深覆古松偶  
聞樵客語忽與道人逢回首來時路嵐陰隔幾重

### 白鶴道院

一別石門久重尋羽士居門堆三日雪鶴寄隔年書乳  
竇泉聲細茅堂竹影疎山中又殘臘生意早梅初

弔朱布衣櫚香先生

先生居南郭外老而盲家貧死無以殮其門弟子葬之

寂寞城南路斜陽照墓門生時雙眼暗死日一棺存誰  
作黔婁諫難招賈島魂荒蕪三尺冢鼯嘯白雲村

### 小茅蓬

不識茅蓬路礧邊逢老樵青松綠石壁黃葉覆山瓢磬

出寒雲杪泉懸古屋梢藤蘿深洞口仙侶坐招要

九陽道院訪朱道士

青天倚石壁中有道人齋鶴跡時當戶松痕忽上堦閒  
親春藥確忙著踏雲屨我欲拾瑤草紅塵願又乖

山家

芒屨踏寒雲一徑翠微裏秋林橫短約人家映清泚炊  
煙殊寂寥山翁出門矣日暮鶴歸巢高風落松子

遊茆蓬禪院

幽巖結蘭若長日佛龕閒僧定鳥鳴澗齋空花滿山探  
泉石藤上採藥松雲間卽此謝塵世深林無往還

山居卽事

深樹隔青溪水禽無數啼山空微雨過門掩暮雲低短  
劍狂能舞新詩醉更題偶逢鄰叟至相對話幽栖

雨坐寄暢園

高閣樹皆響山空多雨聲入松寒翠滴隔竹暗泉生石  
冷調沙鶴池香洗藥鐺彈棋坐來夕鄰院暮鐘清

舟過潯墅行村塢

秋風葭菼外曲塢入煙霏一徑下殘葉孤帆當翠微雲  
行潭上屋人掩竹間扉余意親魚鳥披襟弄夕暉  
偕雪坡湘左青溪泛舟震澤

震澤三年別勞勞夢未醒尊前忽開眼七十二峯青欲  
與同心侶揚帆過洞庭毛公壇下宿龍嘯月中聽

溪閣

溪閣忽秋聲水風萍上生懷人罷琴酌斜日林塘明荷  
外鳥雙下柳陰蟬一鳴隔離施枕簟夢與石泉清

同鮑若洲訪雪坡於郭西僧舍

之子負奇癖蕭然耽苦吟經旬臥蘭若獨自抱焦琴一  
水分官渡諸峯倚夕陰同君訪岑寂因見古人心

蘇臺懷古

滄波苑外碧沄沄楊柳烏啼幾夕曛三百人銷金虎氣

六千士散水犀軍  
煙花南國愁西子  
潮汐東門哭伍員  
轉戰夫椒餘故壘  
秋來閒殺太湖雲

秋祭重來茂苑空  
美人夢醒綺羅叢  
黃池霸業盟徒長  
白苧歌聲調易終  
一水鴟夷連越絕  
三年烏喙沼吳宮  
稱臣請妾尋常事  
眼看夫差到甬東

秋霽汎舟石湖至楞伽山

秋水一幅浮漪漣  
滑膩平展鴉青箋  
越來溪邊美人去  
青山窈窕顏如蓮  
八月明湖雨初霽  
胥江波漲催放船  
柔艣嘔啞棹謳發  
渚日欲上澄霞鮮  
橫塘略約入煙嶼  
頃刻已到楞伽前  
天風吹笠忽飛舉  
蒼松迎立如老仙

松陰無數白鶴語綠雲亂壓詩人肩泠泠塔院響孤磬  
一龕擬說南宗禪多生苦被塵網縛蓮社慙愧無因緣  
石湖居士昔居此釣竿夢拂滄洲煙松陵茶竈張翰酒  
斯人高躅相後先我今欲乞五湖長吳姬蕩漿我扣舷  
生天成佛不可得扁舟散髮稱詩顛

### 五人墓

茄花滿地紅委鬼當頭坐趙燒王甫何披猖釣黨東林  
逮楊左緹騎四出來吳門吳市白晝風霾昏大聲東廠  
索人急銀鐐鐵鎖聲逐喧五人踉蹌趨大府號呼欲救  
周吏部張拳奮臂雷電掣緹騎紛紛竄如鼠大府誰毛

巡撫飛章告變誅五人延頸從容甘鎖斧嗚呼五人市  
僧徒一旦赴義同捐軀死隨吏部化厲鬼披髮上訴鋤  
閹奴纍纍高塚武邱路歲歲棠梨酒一盂君不見碧雲  
寺舊是衣冠葬闕處墓碑百尺委荒榛惡鴟空叫斜陽  
樹

過崑山有感

玉峯如畫草堂前外氏風流付逝川安石聲名重江左  
衛公花木記平泉蛇孟南國張弧日蠹簡西山設局年  
破帽青衫餘宅相夕陽影裏繫吳船

漁舟

離鴻下秋水谿色相與暮泛泛何所之浮生本無住一  
櫂入煙叢笠上松陵雨

松江道中

鱸香亭下夢一夜過吳淞挂席水邊去采蓴人忽逢荒  
雞啼別浦高鶴唳寒茸九點青山色霜清何處鐘

秋柳

尚憶灞橋看青青送玉鞍關山一夜別煙雨六朝寒漠  
漠棲鴉早蕭蕭繫馬難愁聽風外笛吹恨落江干

錢塘懷古

錢塘曾號帝王都鳳翥鸞鸞入畫圖尺土代傳留錢笏



六陵春老葬金鳧  
滄江風雨潮頭弩  
故國繁華屋上烏  
興廢幾經龍漢劫  
殘山一角夕陽孤

冷泉亭

一徑入非想  
寺門開翠微  
維摩此中住  
猿鳥亦皈依  
坐聽流泉響  
多諳靜者機  
空山新雨後  
又長石牀衣

韜光菴

萬竹捎天去  
蕭森晝易昏  
碧雲濃裏寺  
綠海淨當門  
瀑落穿山脇  
藤纏礙石根  
巢居尋白足  
趺坐破苔痕

岳忠武墓

遺恨中興日  
黃龍痛飲難  
人猶思北伐  
天只許偏安  
泥

馬滄江在銅駝故國殘君臣甘棄土父子早登壇少保  
威名赫中原箭血癰六軍推李郭四將壓張韓氣已吞  
回鶻心先抵賀蘭漸收諸郡地欲問兩宮懽宰相方通  
敵書生忽叩鞍金繒紛繹繹玉帳失桓桓南渡官家弱  
東窗婦舌譚弓藏鐘室慘劍賜屬鏤寒自此長城壞眞  
令志士歎星沈天上石瓶泣井邊榦大樹身先死神州  
淚不乾烏頭邊夢斷驢背夕陽看魂定從畱守冤眞過  
曲端舊編程史燦遺尊劫灰完雷電屍分木堂封像鑄  
姦蒼苔纏古碣碧澗響哀湍廢苑春啼鷓荒陵晝穴獮  
祈連高冢時過客涕汎澗

西湖咏南宋遺事十四首

宋家行殿對金牛，竟把杭州作汴州。  
回首牟駝岡下路，芙蓉小苑入邊愁。

一髮青山望七陵，神靈寢殿奉嘗烝。  
梨花寒食南屏路，付與閒僧話廢興。

御書親勅賜官家，便擬西溪駐翠華。  
都下空傳蘇武令，兩宮忘却在龍沙。

符離十萬視師來，心學知非靖亂才。  
莫怪岳侯嗤睡語，相公眞送陝州回。

長槐葉落故宮煙，夢冷東京不計年。  
猶有宣和舊時樣，

都人皆戴孟家蟬

中朝煬竈勢如焚  
汗馬徒勞百戰勲  
落日西湖驢背客  
行人誰識故將軍

大散秋風畫角悲  
渡河誰出武侯師  
尚餘一掬中原淚  
垂死難忘家祭詩

和議紛紛國是非  
雍公萬騎扼淮西  
三更封事燈前讀  
人望君王夜刺閨

廟堂水火劇傾危  
鷹犬平原拜太師  
覆轍竟同元祐事  
南朝又豎黨人碑

閭馬丁東喚不甞  
青山空照法堂燈  
柏黃一燈蕭齋畫

秋雨秋風唱穆陵

老大英雄志未消  
悲歌中夜坐無憀  
分明馬遠圖中見  
剩水殘山似六朝

咸淳師相不知愁  
半壁江山蟋蟀秋  
老向木綿菴裏去  
逢人生怕唱杭州

晞髮孤山醉夕曛  
酒邊花下憶清芬  
琵琶夜月煙江上  
不見南朝汪水雲

愁絕紅羊換劫年  
繁華消盡黯風煙  
過江尚有遺民在  
落日冬青哭杜鵑

紫雲洞

登頓陟寒嶺，豁豁入潛壑。洞戶高霞軒，虛北叩寂寞。日  
月相蔽虧，風雷互噴薄。飛樓皆倒垂，人影度懸索。有如  
頑雲頽，終古不肯落。澄潭杳無底，怒石森欲作。陰沈蛇  
虎腥，變怪鬼神愕。心魂懼逼人，翻念翔寥廓。須臾深井  
出斜陽，挂層嶠。

### 金鼓洞

竄窰出古洞，洞壑復森沈。不聞金鼓響，樵斧在遠林。清  
風竹間至，蒼苔滿秋陰。白日忽高下，碧雲無古今。孤花  
媚寒礪，幽樹悅衆禽。當其萬籟寂，自得山水音。忘言憩  
磐石，雪乳流衣襟。

黃龍洞

磴斷欲無徑夕陽在松門橫策倚古藤寒泉抱雲根藤  
枝森百尺孤榦裂厚坤窈窕立山鬼槎枒攀林猿老僧  
導客入茶煙逗籬垣石靜氣常古洞幽聲無喧飛巖禮  
金仙妙義誰當論鈴鐸響簷角荅我空中言

南園

落日弔平原煙蕪故相園燕巢中國小犬吠侍郎尊粉  
黛銷歌院頭顱出國門劒南曾作記羞說魏公孫

杭州歸櫂過吳江擬游洞庭山

不見鴟臢子孤帆下洞庭青楓隔岸晚白雨打船腥枉

渚連鴈脰平江掠鴈翎時閒采菱唱漁火亂寒星

吳門雜咏

短短木蘭橈紅闌第幾橋水添齊女淚市斷楚人簫春  
草迷香屨秋風捲怒潮煙深舵樓曲日暮雨瀟瀟

塔影倒清池神絃主簿祠前朝流水在舊事夕陽知斷  
劍還千古寒鐘自六時生公石上坐夜半鬼題詩

秋水澹斜陽水風生夕涼斯人懷子美獨立俯滄浪一  
網君無恨孤亭跡未荒隣僧苦多事猶說海陵王

歌舞齊雲歇張王事已空燐飛蕭銑宅花落隗囂宮霸  
業平淮在英靈鎮海雄美人同日殉一炬劫灰中



晚至田家

獨鳥向山盡山中無世喧  
村人候蘿徑秋水到柴門  
谷口誰扶杖林間方灌園  
農家雞黍熟醉酒欲黃昏

山行

依微樵徑石橋邊一道飛流響  
澗泉知有人家水西住  
落花風裏煮茶煙

春申廟

黃公磧下水粼粼寂寞空山弔楚人  
白酒黃雞村賽晚  
野棠寒食古祠春  
琴彈淥水泉流恨客散朱門履化塵  
不見夕陽芳草外章華臺榭亦荒燐

夜聞朔風有感

嚴更屢轉酒力微忽聞朔風撼竹扉沈沈鼓角凍不起  
磊磊星辰寒欲稀邨龙寂歷入門吠塞鴈零亂銜蘆飛  
不知今夜朔風裏天涯多少嗟無衣

小峴山人詩集卷一